

## LI PTITE WACHLÈTE (4)

L' bén mwins franche kwatryinme soû, dimèra a djoke è l'plinne basse, lon èri dèl tère, èt dîre ki c' èstéve là l'pus bia à louker. On vèyève à dès kulomètes au lon èt l' cîr î èstéve come ène bleûwe grande cloke di vère. Dès grands batias î ridîne tofêr èt dès plêjants dofins d' î sorîre èt fé dès cumulèts dins lès waches. Lès balinnes èvoyîne pa tos costés, come dès sipitchroules, di l' euwe dins l' èr.


L' toû dèl cinkyinme soû a vnu ètou. Vineuwe au monde do tîmps d'l'iviêr, èle a polu vîre d'z-ôtès tchôzes ki lès pus vîyes. L' basse èstéve adon tot à fait vète avou, è sakants place, di totès lès foûmes a riglati au solia, dès moncias d'rotches di glace – lès issebèrks – brillants come dès pièles mins bén co pus wôts ki lès pus grandès èglîjes drèssîyes pa lès omes. Èle s'avéve achîd dsus yin èt vîre ki lès batias passîne au pus lon possibe, come s'i nd'avîne peu. Sès

longs tchvias volîne dins l' vènt. A l' anûti dès nûlêyes s' ramoncèlère. L' tonwâr s'a mètu à craker èt d' lancî dès rodjes alumwârs. Lès waches, dismèteuwes èt machurêyes d'nwâr, ont comincî à taper è l' èr dès spès bokèts d' glace. D' èwou c'k'èle èstéve, èle vèyève k'dins tos lès batias on n' èstéve pus à s' n' audje. Lès djins î triyanîne fwârt di peû. Èle avéve bén profité do spèctake èt s' è rafiyî.

Bén shûr, l' prumî còp k' èles gripîne au djoû, lès soûs èstîne tèrtotes èwarêyes di c' k'èle vèyîne mins, après, divneuwes grandes, èles polîne î d' aler à leû shènance, si bén k' èles s' è nn'acostumîne èt fini pa dmèrer è leû maujone. Tot conté, tot rabatu,

c'èst là, ènn'don, k'tot èstéve li pus bia èt k'on s'î sintéve todi au mia.

Tévozé, à l' vièsprêye, s' tinant pa l' mwin, èles montîne tèrtotes èchène èt î tchanter. Leûs vwès èstîne branmint pus bèles k'i l' cine dès omes. Adon, kand l'orâdje arivéve èt k' i gn' avéve do dandjî po lès batias di s' nèyî, èles vinîne tot près èt tchanter d' bon keûr po dîre auzès marins ki l' fond d' l' eûwe èstéve dès pus ayèssants èt ki n' faléve nèn awè sogne d' î dischinde. Maleûreûsmint, lès nèvieûs n' compurdîne nèn leûs mots èt n' vèyîne mauy nèrin lès biatés do fond. Si l' batia si skètéve èt voler au fond, i s'î nèyîne tèrtos èt n' rèche k'bén mwarts dins l' tchèstia do fond dèl basse.



Kand lès soûs èstîne à monter, brès dsus brès dzos, au djoû, l' djonne Wachlète, l' raculote, dimèréve tote mërseule èt n' lès shûre ki dès ouy. Èle ni poléve ki somadjî; lès fèyes dèl basse n' polant nèn braire : èles n' ont pont d' laurmes. Li ptite è nn' avéve don bén dèl sofrance.

- Domadje di n' awè nèn co mès kinze ans ! s'dijéve-t-èle, dj'èl sé bén ki dji vîréve volfîye c' monde là èt lès omes à z-î viker !

Èle a fini pa lès djonde, sès kinze ans. S' tayone l'a ukî èt lî dîre : “Vola, vos vs'aloz vos èmanciper. L' momint èst vnu di vos abéli come vos soûs.

Èle lî a mètu dsus s' tièsse ène corone di blankès fleurs à lumer come dès pièles èt dsus s' keuwe lî aclaper ût grandès moles èt insi moustrer s' noblèsse.

- Î ! mins ça m' fait mau, a dit l' pitite Wachlète.

- I vos faut sofri po ièsse bèle, a répondu s' vîye marène.

(A shûre ?)

\*\*\*\*\*

**On comache todi...**